

2 KORINTOFÓ

Paulo Ovoli Oyade Kĩ Etselε Ema Korintofó

^I Ovoli kīi to yī, Paulo, kī Baguma pau ndε Kristo Yesu fótó onyane ne ye kawε onukpě, mọ boe ọwǎε Timoteo sekě. Bọtselε ovoli a bọama Baguma asọli a kī edeī ne Korinto mọ Baguma bade a kī bideī ne Akaia tite flee a akū.

^{II} Bọawǎ kī Baguma boe Ọlega mọ boe Ọlate Yesu Kristo, bemọ mi kọnya bekpa mi lukudo.

Paulo Nye Baguma Kọle.

^{III} Mifó bonyε Baguma kī enye boe Ọlate Yesu Kristo Ọlega, kī yamọ bati kọnya, kī ye sekě kabumena flee lemε ato a, kọle. ^{IV} Yado boe ọwọle ne boe ọhau flee kame, ayekī bọapuli bọdọla bikī bideī ne ọhau adi nye adi kame a tọwọle, mọ kabumna a kī boe mọawε bọte butomena Baguma sekě a. ^V Nde ayekī bọamọ lubo beblebee odu a kī Kristo mó a, ade aye fotsě Kristo akū bọana tsefǎ katomena Baguma kabumena baū a kame a. ^{VI} Nte bọamọ lubo ni, fonyε kabumena mọ nkpǎ kate fọkpa mi. Nte Baguma bumọ boe ni, ebumọ mọ mi malo, ekpa mi kọbě kī miapuli mina ọwọle bọεε mimó lubo odu a kī de bọamọ a. ^{VII} Foesū boe kọnεte ne mi akū dzě kpli. Kitonεkī bunyina kī ayekī miamọ lubo ndε boe ayea, ade aye mi malo miana kabumena a kī bọana a.

^{VIII} Nwaě ame, bọawε kī minyi ọhau a kī bọna ne Asia kamekame a. Fọlotsa a kī bite ne boe akū

ponɛ paa, fona olome foba boe kalo kɔ botákona kɔ b́abuki budzi nkpá. **IX** Bomó nɛ boe kame kɔ bekɔ boe kɔto bekpa wuda. Lemɛ fukɔ́i ya nɛ boe akú ayekɔ́ boláakɔa anɛ bute nɛ boe mɔawe akú, mbom nɛ Baguma kɔ yadzela banɔkpa a akú. **X** Enyɛ boe etomena wuda tisi kɔ tideɔ́ libe kame, ade yaabuki enyɛ boe a. Bɔkɔa anɛ bute nɛ ye akú kɔ yaabuki enyɛ boe, **XI** ndɛ ayekɔ́ miabumena boe nɛ mi mpaɛbɔ kabɔa kakpa boe kame a. Foesú f́aya kɔ Baguma aatse mi mpaɛbɔ pii a kɔ mibɔa mikpa boe a, lɔkɔa ehila boe, ade bati pii aakɔa osee benyɛ Baguma kɔlɛ nɛ boe lolɔ a.

Paulo Le Letsa a Kɔ De Sũ Edani Ye Nhihie.

XII Letsa mɔa kɔ de akú bɔapia nyɛ kɔ boe towɔlɛ abi boe kɔ budzi kadzi wɔ́ nɛ katinya kame, titiliwu nɛ bomɔ mi kadzi kame. Bɔkɛna foe nné nɛ batidziwa kadikanyi kame, mbom Baguma kɔnyakamɔ kɔbɛ́ kame futo. **XIII-XIV** Bɔtsɛlɛ letsa a kɔ de míapuli miká minu foe kayɔ a odi bɔma mi. Lemɛ titɔ kɔ finyaa mianu boe kayɔ seke mɔ seke malo ni, yɔ́ anɛ teɔ́ kɔ míayanu boe kayɔ yededeede, ayekɔ́ nɛ boe ɔlate Yesu Luwi a akú ni, míata akú nɛ boe akú ndɛ ayekɔ́ boe malo b́akɔa mi bupia a.

XV Ìnyina fɔtsa kɔ́ flee yededeede, ade foesú nkɛna nhiehɛ kɔ maanya lɔto ìyaasɛla mi kufɛ, ayekɔ́ míana kasɛla titi nviã kame nfasɔ. **XVI** Kitonɛkɔ́ nkɛna nhiehɛ kɔ maayasɛla mi nte manaa Makedonia, ade nte mmuniki maya lemɛ maatsã awã, lɔkɔa maate osi katsã kabumena ntomena mi sekɛ́ nnaa Yudea. **XVII** Kɔ́ nkakɛna nhiehɛ kɔ́ a, ntáke otse paa nɛ foe akú mbɔɛɛ?

Mbọεε kī nkenā n̄hihiε a ni, nkenā ye nε batidziwa kawε onukpē kī maapuli n̄lε “Oo” mọ “Oowo” nε lọkọ mọa kame?

XVIII Nε ayekī Baguma akena nε ye kalε akū sū ni, yī letsa a kī n̄lε ãyi nkpa mi a lenyé “Oo” mọ “Oowo” fọletsa. **XIX** Kitonekī Yesu Kristo, Baguma Obi, kī ye akū fọletsa Sila, Timoteo mọ yī bude letsā a lenyé oti kī yalε “Oo” mọ “Oowo” oti, mbom ye n̄yε Baguma a kī yalε “Oo” lọkọ n̄yε lọkọ. **XX** Kitonekī ade ye n̄yε oti kī εnyε Baguma kī yalε “Oo” kī εdzē ekpa ye fọletsa flee a kī εlε eyi a. Ade foesū bọamu Baguma katsāmēna Yesu Kristo akū kalε kī, “Fọya lómọ” a. **XXI** Baguma mọawε lekēna kī bómọ mi nkpā esipi nε ọmọa kakēna nε Kristo kamε. Ade Baguma a mọawε lεpau boe eyi lite, **XXII** eyi boe ọsū kī ye la boe, ade ekọa Hūhū Kpalεwa edo nε boe kamε ndε kasipi nε fọtsa flee a kī yaakpa boe a akū a.

XXIII Baguma n̄yε yī ọdansini, kitonekī enyina yī ọwọlε kamε. Fọnεnε kī mmọ mi konya, ade foesū ntábuki ãya nε Korinto a. **XXIV** Bọtáwε kī bọahε mi nε letsa a kī kenε kī mite mido a akū, kitonekī bunyina kī midzē pintii nε mi katekado kamε. Mbom bọakēna adzuma mọ mi ayekī míámọ kawọlε.

II

I Nε foesū nkenā adzuni kī nláaya nε mi sεkē ayekī míawo ọblo. **II** Kitonekī n̄tε nfō miwo ọblo ni, bawei deī kī baado yī kawọlε? Ade mi mọape a kī nfō miwo ọblo a. **III** Ade foesū n̄tselε ovoli a na mma mi a. Ntáwε kī maya nε mi sεkē lọkọa mi a kī kεfeta kī mido yī kawọlε a miyaafō nwo

ɔblo. Īnyina yededeede kī nte kawɔle ade yī ni, mi malo kawɔle ade mi. ^{IV} Ntsɛle ovoli a ne ɔhau, ɔwɔle kabubuli mɔ babe pii kame. Nné yī kawɛ nye kī mado mi kɔnyɔā, mbom mawɛ kī mimɔ miyi ɔsū ayekī mawɛ mi a flee kale.

Paulo Kɔa Tɔkpa Ɔkenane a Tɔkpa Ete Ye.

^V Leme nte oti odi fɔ odi wo ɔblo ni, nné yī odi efɔ nwo ɔblo, mbom nte nláasese foe ni, mi badi kɔ miwo ɔblo. Ntáwɛ kī mana ɔsī beblebee ne ye akū. ^{VI} Sɔto kavɛle a kī mi bati pii mikpa ye a kpɔla. ^{VII} Finyaakī ni, mikɔa tɔkpa a mite ye, mido ye kɔbɛ ayekī eláatene ɔblo kawo beblebee, ɛyaato flefle. ^{VIII} Ne foesū make mi aduli kī mifɔ emɔ kī miawɛ ye kale paa. ^{IX} Ntsɛle ovoli a na mma mi, kitonekī nwe kī manyi ayekī midzɛ pintii ne mi sɔhɛ kame, mɔ ayekī miakena ne yī fotsa katsa a akū lɔko nye lɔko. ^X Nte mikɔa odi tɔkpa mite ye ni, yī malo nkɔa nte ye. Kitonekī nte nkɔa oti tɔkpa nte, mɔ fusī malo kī nkɔa litsedi nte kɔ ni, makena foe ne Kristo anɛ kame ne mi sū. ^{XI} Nkena foe ayekī Abonsam leláakɔa tɛdake enya mi akū, kitonekī bunyina ye tisi a flee.

Paulo We Kī Yanu Kale Etomena Tito Sekɛ.

^{XII} Kī ĩyaade letsā ne Kristo Kale Wī a akū ne Troa a, mmó kī boe Ɔlate binya osi ekpa ye adzuma kakena ne awā. ^{XIII} Leme fɔha yī paa, kitonekī ntámɔ boe ɔwaɛ Tito ne awā. Foesū nkla bati a ntɛ nnaa Makedonia.

Kristo Fɔ Bɔnya Akū.

^{XIV} Leme bɔanye Baguma kɔle! Kitonekī ne boe ɔmɔa kakena mɔ Kristo kame ni, Baguma

akpã boe nde bati kĩ bipili be ndom aye ne Kristo akũ kanya kodza kame. Baguma tsã boe akũ efõ Kristo akũ foletsa gba ne kako nye kako nde ayekĩ kugua mọ olẽ abọa kanaa mọ lugo. ^{XV} Kalá bọla nde fotsa mọ olẽ kĩ Kristo kọa ebọa afolie ekpa Baguma, ade bọgba buko ne bikĩ belamena nkpã kate kana, mọ bikĩ baawọ a kame a. ^{XVI} Bọla nde nfiã kpitii kĩ yako bati a kĩ baawọ, lemẹ bọla nde olẽ kloũkloũ kakpa bikĩ baana nkpã kate a. Owei aapuli ekena adzuma kpale kĩĩ odu? ^{XVII} Boe kõ bọlá nde bati bebã pii kĩ benee Baguma kale a nde kọyaato fotsa kĩ folá kọya mọ kanọ aye. Lemẹ ne ayekĩ Baguma do boe sũ ni, bọale kale ne ọnokọali kame ye ane kame, nde Kristo basumune aye.

III

Bonye Apam Vọẽ a Basumune.

^I Katsa foatsa kĩ bubuki bọapia boe akũ mbọee? Kane kene kĩ bọkpa mi boe akũ adansie tuvoli, mbọee kĩ bọte te butomena mi sekẽ nde ayekĩ bati badi akena a? ^{II} Ade mi mọawe a nye tuvoli kĩ betsele ne boe tọwọle kame, kĩ odi nye odi aapuli enyi ekã lemẹ. ^{III} Foe kame kpale kĩ Kristo mọawe letsele ovoli kĩĩ ekpa boe bọkọa bọma mi. Betáko a ovoli katsese mui betsele ye, mbom bekọa Baguma kĩ edeĩ nkpã a Hũhũ betsele foe. Betátsele ovoli a ne sileti akũ, mbom betsele ye ne batidziwa du akũ.

Baguma Kpa Boe Nkpã Ne Apam Vọẽ a Kame.

^{IV} Bọale fukĩ kitonekĩ ne Kristo sũ, budeĩ kadzakõ ne Baguma ane. ^V Letsama leláa boe

kame kī laafō bole kī bóapuli bókena adzuma kīī. Kobē a kī budeī to Baguma sekē. ^{VI} Ade ye lefō kī bupuli bónya apam vōē basumune, kī enyé mbla a kī betsele biyi a, mbom bóasum ekī Hūhū kame edeī a. Mbla a kī betsele a tsēmō wuda leme Hūhū ade a kō akpa nkpā.

^{VII} Loko a kī Baguma kōa mbla a kī etsele ne boe tratra akū yakpa Mose a ni, Baguma nye ye kukūkpale etsa. Mose ane kame kata muamua mō osī mō osī, mō kukūkpale paa kī Israelfō tápuli bike ane ne ye akū, tito kī kōkadī malo. Nte mbla a kī etsēmō wuda a né mō kukūkpale mō osī a ni, ^{VIII} kekō nte bekōa Hūhū a bakpa a, kukūkpale a aana osī kōba paa. ^{IX} Nte osi a kī batsā ye akū kana kōtōkaku ayamō kukūkpale, kekō osi a kī etsēmō nkpā lelāana kukūkpale baū eba! ^X Boale foe lomō kitonekī finyaa kukūkpale a bē kōtonyade a, ade kukūkpale a kī kōna osī kōkōe a yela a. ^{XI} Kitonekī nte kukūkpale na ne letsa kī letábuna owi akū ni, kekō letsa a kī laawa daa a kukūkpale aana osī kōba.

^{XII} Ayekī budeī kōnete kīī sū ni, budeī owōle kado paa. ^{XIII} Boe kō bolá nde Mose kī ekōa lima esua ane kī Israelfō betamō ye ane kame kata muamua kī fōlamēna kadī a. ^{XIV} Ne onokōali kame ni, be adzuni kame tábinya keyawo nviā. Nte bakā tuvoli kōe a kame fōletsa a malo ni, lima mōape a buki lasua be ane. Omōa kakēna mō Kristo kame odi mō baanye lima a na. ^{XV} Ne nviā fuwi kīī kame malo ni, nte bekā Mose ovoli kame fōletsa a, ane kasua fōtsa a buki fōasua be adzuni. ^{XVI} Leme nte odi muniki eya ne Olate a sekē ni, baanye limakū a ne ye ane. ^{XVII} Finyaakīī

ni, “Ọlate a” ne fọletsa kīi kame nye Hūhū a, ade awā kī boe Ọlate Hūhū deī ni, kaweya lemē deī ne awā. ^{XVIII} Foesū benye limakū a ne boe flee ane, ade banye boe Ọlate kukūkpale a katsa yededeede a. Elamena boe kadani kanamena ye kutidu odu a kame, ade boe kukūkpale lemē ade ne ode kabu a.

IV

Hūhū Kame Fọtsa Kī Fọte Kọya Ne Fubui Kame.

^I Ayekī Baguma mó boe konya, ekwa osum adzuma kīi edo ne boe awe sū ni, akpo láveli boe. ^{II} Bofone fọtsa belawa mo fonyoatsa flee awe buyi ne oówē. Bóákena letsama ne kake osi akū, ade boádani Baguma fọletsa a kale a. Ne onokwali kame ni, budzi nkpā wī ne Baguma ane, ade boaboa mbodi kī boe kadzi kame kiwo odi nye odi ane a. ^{III} Kitonekī nte Kale Wī a kī boale a nye fọtsa kolawa ni, fonye fọtsa kolawa fokpa bikī betšē ne kayela osi akū a. ^{IV} Katinya kīi kame oti kpa a ko bati a kī betáte bido a adzuni. Esua be ane kī betamo Kale Wī a ohaī a ne Kristo kukūkpale akū a, kī kola nde Baguma kutidu pɛpɛɛɛ a kī koako ne be akū a. ^V Kitonekī boáde letsā ne boe moawe akū, mbom boade letsā ne Yesu Kristo boe Ọlate akū, ade boe kō bonye mi basumune ne Yesu sū a. ^{VI} Baguma a kī ele kī, “Ọhaī evole eto otū kame” a, ade ye nye Baguma moape a kī ye ohaī a ko ne boe towole kame, ekpa boe kadikanyi kī bomo Baguma kukūkpale ne Yesu ane kame a buyi osū.

VII Leme boe a kī boe kame hūhū fotsa mo koya kī deī a, bola nde tIBUTE fubui aye. Ekena fukī yatsa kī kōbē kpale fle a nye ye Baguma kude, nné boe kude kōanē. VIII Loko pii bawe boe kado ne ohau kame leme baánya boe akū, ade foko fudi bakena boe adzuni basabasa leme akpo láveli boe da. IX Bakesine pii deī ne boe akū, leme budeī okoba odi kī yaálo kafone boe, ade foko fudi baboa boe kamuni kapila boe leme baáko boe. X Loko nye loko boe sukena amo lubo nde Yesu wuda tsefā a aye, ayekī baamo ye nkpā kadzi a ne boe sukena kame. XI Ne boe nkpā flee kadzi kame ni, wuda ado boe libe daa ne Yesu sū, ayekī baamo ye nkpā ne boe sukena kī saaku a kame. XII Fukī atsa kī wuda lamena adzuma kakena ne boe kame, ade nkpā leme lamena adzuma ne mi kame a.

XIII Katsela Kpalewa a le kī, “Nle kodzela kitonekī nte ndo.” Ne hūhū moape a katekado onukpē ni, boe malo boale kodzela kitonekī bote budo. XIV Bunyina kī Baguma a kī edzela boe Olate Yesu edzi nkpā a aadzela boe malo, loko a ekpā bomo mi lodo enamena Yesu ane kame. XV Bakena fukī bame flee ne mi kale sū. Nde ayekī Baguma semekale lamena bati pii sekē kawo a, ade aye baakoa kolekanye mo mpaebo bekpa Baguma ne ye kukūkpale kame a.

Bóana Obu Mo Kawole Baĩ.

XVI Ne fukī sū ni, akpo láveli boe dadaada. Tito kī boe sukena kī lamena kavō malo ni, boe hūhū a kō ana nkpā vōē luwi daa. XVII Lubokamo kabii lukū kī aakpa boe kukūkpale kī foláana kawūna da, ade fóaba lubo a kī boamo a. XVIII Boe ane líteĩ

ne fotsa a kī bɔamɔ a akū, mbom futeĩ ne fukī bɔámɔ mɔ ane a akū. Letsa a kī bɔapuli kamɔ mɔ ane waa fɔkpa ne lɔkɔ lukū kame, leme letsa a kī bɔláapuli bɔmó mɔ ane a aana daa.

V

^I Kitonekī bunyina kī nte biveli boe tite akū lere kī budzi ne de kame, kī de nye boe sukena a, Baguma aakpa boe kɔla vɔẽ kī ye mɔawe eke ne ode budzi ne koe kame daa. ^{II} Finyaa bɔaweya kake, ade boe kawɛ mɔ ɔsĩ mɔ ɔsĩ nye kī Baguma ekɔa boe ode tɔtɔ sukena a esua boe akū. ^{III} Nte ekɔa se esua boe akū ni, bɔláadzi ɔdzɔ. ^{IV} Kī budzi ne tite akū lere kī kame sū ni, bɔaweya kake kī boe fɔlɔtsa tɛne ɔlɔme. Nné kawɛ bɔawe kī benye tite akū sukena kī ne boe akū, mbom bɔawe kī Baguma ekɔa ode side a edo boe ayekī sukena a kī saaku a, aadani flefle sekena siki saana nkpā. ^V Baguma nye oti a kī emane boe ekpa kadani kī, ade ekɔa ye Hūhū ekpa boe nde kasipi ne fotsa flee a kī emane eyi boe a akū a.

^{VI} Foesū bɔado boe akū kɔbẽ luwi daa. Bunyina kī nte busila budzi ne tɔtɔ kī tenye sukena tɔtɔ kame kɔ ni, bɔvɛle akū ne boe ɔlate ɔwẽ. ^{VII} Kitonekī katekado bɔkɔa budzi nkpā, nné letsa a kī bɔamɔ mɔ ane a. ^{VIII} Budeĩ ɔwɔle, ade bɔawe mbom kī bɔane ne boe sukena tɔtɔ kame bɔnaadzi ne tɔtɔ kame ne boe ɔlate a sekẽ. ^{IX} Leme letsa a kī lebẽ flee nye kī, bɔawe kī bɔakena letsa a kī laawo boe ɔlate ane, nte budzi ne boe tɔtɔ kame ne awĩ ñye bɔnaa ye sekẽ. ^X Kitonekī boe flee bɔanadza ne Kristo ane kame, edzemo boe. Odi nye odi aate kotokase ne letsa nye letsa a kī ekena a onukpẽ, nte fɔnye tuwĩ

ĩye tɔkpa a kĩ ɛkena ne ye katinya nkpã kadzi onukpẽ.

Bɔtsã Kristo Akũ Bɔkena Tɔkɔba Mɔ Baguma.

XI Bunyina ayekĩ kenɛ kĩ buvila boe ɔlate, foesũ bɔabɔa mbɔdi kado bati bebã kɔbẽ kĩ bivila ye. Baguma kɔ nyina ayekĩ bɔla yededeede, ade mate kado kĩ mi malo minyina yĩ ne mi tɔwɔle fii kame a. **XII** Bɔlámɛna boe akũ kabuki kamu katsa mi, mbom bɔawe kĩ bɔakpa mi osi minyi letsa sũ kĩ mita akũ ne boe akũ. Bɔkena foe lɔmɔ ayekĩ míapuli mina mbuaye mikpa bikĩ badã oti kutitse kapia ne ye akũ, kĩ nné ye ɔbla badã a. **XIII** Nte bati badi ale kĩ boe fɔlɔ kame bu kade ni, Baguma sũ fubu kade. Lemɛ nte boe fɔlɔ kame waa yedede ni, mi kale sũ fɔla lɔmɔ. **XIV** Kristo ɔɔɔ anya boe akũ, kitonekĩ finyaa bɔmó buyi ɔsũ kĩ oti mɔape liku ne bati flee lolɔ, kĩ fɔatsa kĩ bati flee liku ne ye wuda a kame. **XV** Eku ne bati flee lolɔ, ayekĩ bikĩ bidzi a leláabuki bidzi nkpã bekpa be akũ, mbom baadzi bekpa ye odi pe a kĩ eku, kĩ bedzela ye edzi nkpã ne be kale sũ a.

XVI Foesũ kito finyaa kanaa ni, boláabuki bɔdzɛmɔ odima bɔkɔ ye kɔtɔ ne otidziwa kakona onukpẽ. Tito kĩ bɔdzɛmɔ Kristo tɔ ne bati adzuni onukpẽ malo ni, bubuki bɔákɛna foe. **XVII** Nte odi kɛna ɔmɔa mɔ Kristo ni, ɛdani oti vɔẽ, oti kɔɛ a naa, ɔvɔẽ leya. **XVIII** Baguma lekɛna fukĩ flee, ɛtsã Kristo akũ ɛdani boe, ye bakesĩne a ɛkena bakɔba, ade ɛkpa boe adzuma kĩ boe malo bɔkɛna bati bebã ye bakɔba a. **XIX** Boe fɔletsa nye kĩ Baguma tsẽ Kristo akũ yalola bɛmɔ batidziwa flee kayite bedani ye bakɔba. Baguma

táte batidziwa tókpa eyi, mbom ekpa boe ọlẹdo kī bude letsā kī elola bẹmọ batidziwa flee kayite.

XX Foesū bido boe kī bọle kale bókpa Kristo. Fókena nde Baguma awe lamena bati kade katsāmena boe akū. Bọake mi aduli ne Kristo dī akū kī mifō Baguma edani mi nde ye bakesīne a ekena ye bakoba. XXI Tito kī Kristo tákena tókpa tidima malo ni, Baguma fō elo boe tókpa enamena ayekī nte bókena ọmọa mọ ye ni, boe malo bóanya bati kpī ne Baguma ane.

VI

I Foesū kī bọmọ Baguma bọakena adzuma sū ni, bọake mi aduli kī mitafō konya a kī Baguma mó mi a lekena fotsa pupilidza. II Mitse letsa a kī Baguma le,

“Kī loko wo ọto kī mmọ mi konya a, ntse mi,
kī luwi a wo ọto kī mate mi nkpā a, mbumọ
mi.”

Mitse! Ade finyaa kene kī bọate Baguma konyakamọ a, nviā nye luwi a kī ete boe nkpā!

Paulo Lubokamọ.

III Bọáwe kī odima amọ nfumusu ne boe adzuma akū, foesū bọáwe kī bọakena letsa kpa lidima kī laasua odi osi. IV Mbom ne letsa nye letsa a kī bọakena kame ni, bọatsa kī Baguma basumune bọane. Ne foesū bọado ọwọle kate ọhau, kamọ lubo mọ ohiā mọ ọwọle bọee. V Bibo boe, bido boe ne kọla, bido ọtutū ne boe kame, befō bókena adzuma bọtē ọbē, ade budzi tida katawa mọ katanya malo a.

VI Ne letsa nye letsa kame ni, bọbọa mbọdi kī bọanya bati kpalewa ne Baguma ane. Bókọa

boe kadikanyi, ɔwɔle bɔɛɛ mɔ boe sɛmɛ kale kakena bɔatsa kɪ Baguma basumunɛ bɔanɛ. Fukɪ fubu nyɛ kɪ Hũhũ Kpalɛwa mɔ ɔɔɔ dzununuunu, VII boe ɔnɔkɔali ɔlɛdo a, mɔ Baguma kɔbɛ abumɔ boe. Bɔnɛɛ kadzi kpɪ nɛ Baguma anɛ a ndɛ boe kawũkanɔ fotsa kɪ bɔkɔa bɔanɔ kawũ, ade bɔakɔa foɛ bɔapili boe lɔlɔ lɛmɛ a. VIII Bakpa boe obu, badi asupa boe, badi avũna boe badi lɛmɛ amu boe. Badi adã boe ndɛ bavãlɛvã bɔanɛ, lɛmɛ bɔalɛ ɔnɔkɔali kale a. IX Bakɛna boe ndɛ bati kɪ binyina, lɛmɛ bati flee nyina boe. Babu boe ndɛ bati kɪ belá nkpã lɛmɛ budeĩ nkpã. Titɔ kɪ bavele boe sɔtɔ malo ni, betáko boe, X titɔ kɪ bido boe nɛ ɔbɔɔ kame malo ni, bɔamɔ kawɔle luwi daa. Bɔadã ndɛ ahiãfo lɛmɛ bɔafɔ bati pii akɛna asikafo. Bɔkɛna ndɛ bɔlã lɛtsama lɛmɛ nɛ ɔnɔkɔali kame ni, ade boe deĩ lɛtsa nyɛ lɛtsa a.

XI Nwaɛ amɛ Korintofɔ, bubinya boe tɔwɔle kame mɔ ɔɔɔ bɔkpa mi, ade bubɪ mi ɔnɔkɔali foletsa a yededeɛ. XII Nnɛ boe lɛtanye boe ɔɔɔ kanya, mbom mi lɔkɔa mi ɔɔɔ mikɔla boe. XIII Foesũ finyaa mabi mi tuwuli ndɛ yĩ babi aye. Minyɛ mi tɔwɔle kame foletsa mitsa boe ndɛ ayekɪ boe malo bɔakɛna kakpa mi a.

Mitakɛna ɔmɔa Mɔ Bikɪ Betátɛ Bido a Nɛ Lɛtsama Kame.

XIV Mitakɛna ɔmɔa mɔ bikɪ betátɛ bido a. Tuwɪ kakɛna mɔ tɔkpa kakɛna aapuli tekpɔta tekɛna lɛtsa mɔa mbɔɛɛ? Nde ɔhaĩ mɔ ɔtũ aapuli bidzi bɛkpɔta? XV Nde Kristo mɔ Belial baviɔ a aapuli bɛkɛna onukpɛ mɔa? Litsa nyɛ lɛtsa mɔa kɪ lideĩ nɛ ɔtɛ odone mɔ ekɪ etátɛ edo kayite?

XVI Nde Baguma asoli kola mɔ kuviɔla aapuli beken a ɔmɔa? Kitonekĩ boe nye Baguma kĩ edzi nkpã a asoli fɔla! Baguma mɔawɛ lɛ kĩ, “Maake toto nɛ yĩ bati sekẽ, lɔkɔa maadzi nɛ be kame. Maanya be Baguma lɔkɔa benya yĩ bati.”

XVII Foesũ boe ɔlate a lɛ kĩ,

“Midzakũ nɛ be sekẽ,
minye mi akũ nɛ be kame.

Mitakena letsa a kĩ de akũ tákpale,
lɔkɔa maate mi atuu.

XVIII Maanya mi ɔlega

ade mi míanya yĩ babinyole mɔ babitsole a.
Ade aye boe ɔlate Mɔ Kɔbẽ Flee a lɛ a.”

VII

I Nwaẽ amɛ, ayekĩ bekpã boe konete nɛ fukĩ flee akũ sũ ni, mifɔ bɔkpale boe akũ nɛ letsa nye letsa kĩ laɔo sukɛna mɔ hũhũ efĩ a kame. Mifɔ boe kadzi kame flee kedã yedede nɛ Baguma kavila kame.

Paulo Mɔ Kawɔle Nɛ Ayekĩ Korintofo Dani Tɔwɔle Kame Sũ.

II Minye mi ɔɔo mitsa boe. Botáfum odima, botábula odima kadzi kame kade, ade botásisi odima lemɛ a. III Ntále fukĩ kĩ mako mi koto, kitonekĩ nde ayekĩ nle ñnyamena loto a, mite koya mikpa boe paa kĩ nte fɔnye wuda malo ni, bɔmɔ mi aaku, ade nte fɔnye nkpã lemɛ ni, bɔmɔ mi aadzi nkpã. IV Nte mi ndo paa ade mapia akũ nɛ mi akũ lemɛ a. ɔwɔle ka edzi yĩ. Nɛ boe lubo kamɔ flee kame ni, mbuki ndeĩ ɔwɔle paa, ade kawɔle ade yĩ paa a.

V Kĩ boyawo Makedonia malo ni, botána kaweya kadima. Bómó lubo ne kako nye kako, bati do boe tɛdzɛ ade libe na ne boe kame a. VI Leme Baguma kī yado bikī akpọ veli be kóbě a, do boe ɔwọle ne Tito kaya kame. VII Nné Tito kaya a odi lido boe ɔwọle, mbom ye adansie a kī edi ne mi akū kī mido ye ɔwọle a leme bu. Ebi boe ayekī miwe paa kī miamo yī, ayekī fuwo mi kalɔe ne letsa a kī leya a akū, mọ ayekī mimane akū midzi kī miáda ne yī liti mipili yī loló. Ne foesū finyaa mamọ kawọle kaba kókọe a.

VIII Kitonekī nte ovoli a kī ntsɛle mma mi a fō miwo ɔbọdọ malo ni, fótáwo yī kalɔe kī ntsɛle ye. Fóapuli fuwo yī kalɔe kitonekī mmó kī loko lukū odi kame mọ miwo ɔbọdọ. IX Leme finyaa, kawọle ade yī, nné kī ndo mi ɔbọdọ a sū, mbom mi ɔbọdọ kawo a fō midani mi kadzi kame. Baguma kawɛ fɔane kī miwo ɔbọdọ, foesū letsa a kī bakena a nye nfasọ mbom fókpa mi. X Kitonekī ɔbọdọ kawo a kī fonye Baguma kawɛ afō oti adani ɔwọle kame, ade fɔakpá ye kanamena daa nkpá a kame a. Fukīnaa láwo kalɔe! Leme nte oti wo ɔbọdọ ne katinya kame kawɛ onukpě kō ni, wuda fɔavele kayamena. XI Midá ayekī ɔbọdọ kīi odu, kī Baguma awe a akena adzuma ne mi kame! Fɔfō miayili akū kakena fɔtsa wī, ade fɔfō miakpale mi akū a. Fɔfō miana kalokpa ne fɔtsa a kī fótákpọla akū, fɔfō miavila ade fɔfō miadā ane mọ ɔsī mọ ɔsī a. Fɔfō miana ovio ne fɔtsa kakena kame, ade miawe kī bevele oti a kī ekena tokpa a soto a. Ne foe flee kame ni, minye mi akū miatsa kī mitádi mfumsu ne fɔletsa a kame.

XII Foesū tito kī ntsɛle ovoli a na malo ni, nné oti

a kī efum, ĩye ekī ye bifum a sũ ntselē ye. Mbom ntselē ye matsa ayekī miakŃa mi akũ flee kakpa boe a ne Baguma anē. ^{XIII} Ade foesũ bokado ōwŃlē a.

Nnē ōwŃlē kado odi bŃna, kawŃlē de boe baũ ne kawŃlē a kī Tito mŃ ne mi akũ a sũ, kitonekī ebi boe ayekī mi flee mifŃ ōwŃlē ka edzi ye a. ^{XIV} NkŃa mi mpia ntsa ye, ade mitádo yĩ konyŃā lemē a. Bubi mi ōnokŃali kalē a, ade ayea kapia a kī bupia bŃtsa Tito a lemē yanya ōnokŃali a. ^{XV} Ye ōdo ne mi akũ ade ne ode kabu, nte ete anē ne ayekī mi flee miwē kī míakēna ne ye fŃtsa katsa akũ, mŃ ayekī mite ye atuu ne obu mŃ kukũtila kamē a. ^{XVI} KawŃlē ade yĩ, kitonekī maapuli nkŃa anē nte ne mi akũ ne letsa nye letsa kamē.

VIII

KristofŃ Te FŃtsa Faa.

^I Nwaē amē, bŃawē kī minyi letsa a kī Baguma tsāmena ye kŃnya kamŃ kamē ekēna ne Make-donia tesŃli a kamē. ^{II} BesŃ be bedā ne lubo kamŃ mŃ ōsĩ mŃ ōsĩ kamē, lemē fude be kawŃlē baũ, foesũ titŃ kī ahiāfŃ banē malo ni, bite fŃtsa mŃ kawŃlē. ^{III} Maapuli nle pipiipi kī bite fŃtsa ndē ayekī baapuli, malo kŃlāa ni, bite fŃba be kŃbē. Ne be mŃawē kawē onukpē bite fŃtsa faa. ^{IV} Bike boe aduli mŃ ōsĩ mŃ ōsĩ kī bokpa be osi be malo bibumēna Baguma bade a kī bideĩ ne Yudea bakēna adzuma a. ^V Fukī bekēna kī bē letsa a kī de akũ bute anē. Letsa letŃnyade nye kī bekŃa be akũ bekpa boe ōlate, ade ke liti a, bekŃa be akũ bekpa boe ne Baguma kawē onukpē.

VI Foesũ budo Tito, kĩ ye liyi adzuma kĩĩ kayo a kɔbɛ, kĩ enaa loto mo ye adzuma, lokoa ebumena mi miwũna odo adzuma titiliwu kĩĩ. **VII** Finyaa minye bati kĩ benyaa loto ne letsa nye letsa kame. Mi katekado, mi kodzela kale, mo mi kadikanyi awo ane. Miayili akũ ne letsa nye letsa kame ade miawe boe kale a. Ne foesũ boawe kĩ minya loto ne konyakamo adzuma kĩĩ leme kame.

VIII Nnɛ mbla adima masui nkpa mi, mbom ne ayekĩ bati bebã lamena akũ kayili kĩ bakpa kabumena sũ ni, mawe ñnyi nte mi odo a kĩ mideĩ a leme kpola. **IX** Minyina boe Olate Yesu Kristo konya kamɔ a kĩ edeĩ ekpa boe, ade tito kĩ enye osikani malo ni, ekena ye akũ nde ohiãni ne mi kale sũ, ayekĩ yaakena boe asikafɔ ne ye tihia a kame.

X Yi kakona nye kĩ fonene kĩ miwũna adzuma a kĩ miyi kayo katukoɛ a. Mi nyɛ bati batonyade kĩ biyi kayo, ade minya batonyade malo kĩ bituno kĩ baakpa a. **XI** Finyaa mikena adzuma a minamena loto lokoa miwũna ye! Miyili akũ miwũna ye nde ayekĩ mikoa miyi ye kayo a. Mikoa futetsa a kĩ mideĩ a mikena adzuma a. **XII** Nte futo odi owole kame paa kĩ yaate fotsa ni, Baguma aate fukĩ ena ekpa a, leme nnɛ fukĩ elá a.

XIII Nlamena bati bebã folotsa akũ katinya kĩ makoa ndo mi fude olome, **XIV** leme ayekĩ mideĩ fotsa pii ne loko kĩĩ kame sũ ni, fonene kĩ miabumo bikĩ fusĩ be a. Ke liti nte keyaasĩ mi, mo bideĩ fotsa pii ni, baabumena mi. Ne osi kĩĩ akũ ni, mi akũ kabumena a aaketi. **XV** Betsele ne KatsELE Kpalewa a kame kĩ, “Ekĩ ekpota fotsa

beblebee tána fublusu, ade ekĩ ekpota kabii leme tási letsama a.”

Bido Tito Mo Ye Bakoba Ne Korinto.

^{XVI} Bɔanye Baguma kɔle kĩ efɔ Tito bɔa mbɔdi yabumɔ mi nde ayekĩ boe malo bɔawe kĩ bɔakpa mi kabumena. ^{XVII} Kĩ bubi ye kĩ eya ne mi sekẽ a, etunɔ mɔ kawɔle. Leme fɔnye ye kawɔ kɔkɔe kĩ yaya ne mi sekẽ. ^{XVIII} Budo bemɔ boe ɔwaɛnyole, kĩ tesoli bati a flee akpa obu paa ne ye Baguma fɔletsa kale kame a kĩ etomɔ ye. ^{XIX} Letsa a kĩ libu nye kĩ tesoli a lenye ye, bitunɔ leme kĩ etsã etomɔ boe bɔkena ɔɔo adzuma a fudo boe ɔlate obu, lɔkɔa fotsa leme kĩ bɔwe kĩ bɔakpa bati bebã kabumena.

^{XX} Bɔadã kadã wĩ kĩ odima leláayavia boe kadi etomena ayekĩ bɔakena semɔ kale futetsa kĩ akũ adzuma. ^{XXI} Boe botae nye kĩ bɔakena letsa a kĩ lenye ɔnɔkɔali, nné ne boe ɔlate odi anɛ, mbom mɔ batidziwa leme anɛ.

^{XXII} Foesũ budo boe ɔwaɛ kĩ etomɔ be. Bɔso ye bɔdã lɔkɔ pii ade bɔmó kĩ yabɔa mbɔdi ne fɔtsa pii kakena kame a. Ade finyaa, kĩ ete mi edo paa sũ ni, akũ asĩ ye paa kĩ yayaakpa mi kabumena. ^{XXIII} Tito kɔ ni, enye yĩ ɔkoba paa kĩ bɔakena adzuma bubumɔ mi. Boe bawaɛnyole bebã a kĩ bitomɔ ye a kɔ ni, ade be dzẽ ne tesoli a kadzakɔ bekɔa kamu bakpa Kristo a. ^{XXIV} Minye mi ɔɔo mitsa be, ayekĩ tesoli a flee aate bido, binyi leme kĩ boe kukũpia ne mi akũ a nye ɔnɔkɔali.

IX

Bate Badone Bebã a Kabumena.

^I Fọtásĩ kọlaa kĩ matselẹ mi ovoli nẹ futetsa a kĩ miakọa kama Baguma bade a kĩ bideĩ nẹ Yudea tite akũ a akũ. ^{II} Ìnyina kĩ miawẹ kĩ miakpa kabumena, foesũ nkọa mi mpia ntsa bati a kĩ bideĩ nẹ Makedonia tite akũ a. Nlẹ kĩ, “Boe bawaẽ nẹ Akaia tite akũ a manẹ akũ kĩ bakpa kabumena anẹ katukọe.” Mi mbodi nẹ foe akũ fõ fi wo nẹ be sekẹ mọa pii kame. ^{III} Finyaakĩ mado boe bawaẽ kĩ nẹ mi sekẽ, ayekĩ baamọ kĩ boe kukũpia nẹ mi akũ nẹ futetsa akũ a lenyé kọdzela pupulidza. Lemẹ nde ayekĩ mbi be kĩ mimanẹ akũ mọ mi fubumenatsa a, mawẹ kĩ mina nẹ kukũmanẹ kame lomọ. ^{IV} Lemẹ nte Makedoniafọ aatomọ yĩ beyaamọ kĩ mitámanẹ akũ mikpa futetsa a kọ ni, konyọã aawo boe, lemẹ konyọã baũ aawo mi kọba, kitonekĩ baakona kĩ boténe anẹ kate nẹ mi akũ. ^V Foesũ nkona kĩ fusĩ kĩ mapiã boe bawaẽ kĩ benya yĩ loto lọkọa beyaamanẹ futetsa a kĩ mile miyi kĩ miakpa a. Futetsa kĩ aakpọta nte ìya, ade fọatsa kĩ mi ọwọlẹ kame futo sũ mikpa, fonyé fukĩ behe mi kĩ mikpa.

Baguma Awe Oti Kĩ Yate Fọtsa Kĩ Futo Ye Ọwọlẹ Kame.

^{VI} Mite anẹ kĩ oti kĩ edu funitsã kabii ni, funitsã sukuloo yaana, ekĩ edu funitsã pii aanye funitsã baũ. ^{VII} Foesũ odi nye odi ekpa nde ayekĩ ewe futo ye kame, etakena foe mọ kalọe ìye kĩ fonye ọhe kĩ ekena sũ, kitonekĩ Baguma awe oti a kĩ yakpa fọtsa mọ kawọlẹ. ^{VIII} Baguma aapuli ekpa mi fọtsa eba fukĩ misĩ, ayekĩ loko nye loko míana fọtsa a kĩ misĩ mikpa mi akũ a, mina fubulusu

mikɔa mikena tudzuma wĩ tidi nye tidi. IX Katsɛɛ
Kpalewa a ɛ kĩ,

“Yakpa ahiãfɔ fotsa faa

ade ye sɛmɛ kalɛ kakɛna waa daa a.”

X Baguma kĩ yakpa okuani fudutsa mɔ funitsã
kĩ yanya, aakpa mi fudutsa flee a kĩ misĩ a, ɛfɔ
fubo anɛ fɔkpa mi funitsã beblebee ayekĩ miakɔa
mikena sɛmɛ kalɛ tudzuma pii. XI Baguma aafɔ
mina akũ fotsa daa, mipuli mikakɛna sɛmɛ kalɛ
lɔkɔ nye lɔkɔ, ayekĩ bati pii aanye Baguma kɔɛ
nɛ futetsa a kĩ bɛtɛ bitomɛna boe sɛkɛ a sũ.

XII Kitonɛkĩ kabumɛna a kĩ mikpa a ni, nnɛ
Baguma bati a odi kasĩ onukpɛ mipi, mbom fɔfɔ
bati pii aanye Baguma kɔɛ paa. XIII Letsa a kĩ laato
mi ɔsum kĩ kame aafɔ bati pii limu Baguma,
kitonɛkĩ mite Kristo Kalɛ Wĩ a mido, mikena nɛ
ke akũ, ade mikena sɛmɛ kalɛ kĩ mite fotsa mikpa
be mɔ bati bebã lɛmɛ a. XIV Foesũ baakɔa ɔɔɔ kĩ
eto ɔwɔɛ dzununuunu kame bebɔa mpɛɛ bekpa
mi, kitonɛkĩ Baguma mɔ mi kɔnya pii. XV Mifɔ
bɔnye Baguma kɔɛ nɛ ye futetsa a kĩ ɛkpa boe,
kĩ bɔláapuli bɔnye foe kayɔ sũ a!

X

Paulo Pili Ye Adzuma Lɔlɔ.

I Yĩ Paulo mɔawɛ lamɛna mi aduli kake. Ade
yĩ bati alɛ kĩ ñnye oti dɔwa nte ndeĩ nɛ mi kame,
lɛmɛ nte nláa mi sɛkɛ kɔ ni, ndeĩ awũni. Ntsɛ
Kristo akũ kadɔla mɔ ye sɛmɛ kalɛ kame, II make
mi aduli kĩ nte ñya nɛ mi sɛkɛ ni, mitafɔ ñyaana
awũni, kitonɛkĩ matɛ kado kĩ maapuli nna awũni
paa nɛ bikĩ bale kĩ katinya liti katomɛna sũ
bɔakɛna adzuma kĩ akũ a. III Fɔnye ɔnɔkɔali

kĩ katinya kame budzi, leme boáno kawũ ne katinya kame kobẽ onukpẽ. ^{IV} Kawũkano fotsa a kĩ bõnẽ boano a lenyẽ katinya kame fude, mbom fõnye Baguma fude a kĩ fudeĩ kobẽ, kĩ bõkõa boabubuli okesĩne fudzikõ mo osĩ a. ^V Boabula fõvã kama fõletsa a kĩ bati avele a kade. Boawõla letsa nye letsa kĩ latsa kapia kĩ fõasua Baguma kanyi osi. Boapi adzuni adi nye adi nde ayekĩ bapili bati ne kawũ kame kĩ ekena ne Kristo kawe akũ. ^{VI} Nte mikõa mi akũ flee mikpa boe, mo miatse boe oledo ni, boe malo bõmane akũ bõkpa kĩ bõavele odi nye odi kĩ yakena ato osĩ a soto.

^{VII} Miadã oti ane kakena fotsa. Odi deĩ ne mi kame kĩ yabu ye akũ kĩ enye Kristo ode mbõee? Nte aye ni, mifõ owula ebuki ekona ye akũ edã, kitonekĩ nde ayekĩ enye Kristo ode a, ade aye boe malo bõnye Kristo bade a. ^{VIII} Kitonekĩ konyõã lãkõ yĩ, nte ntene kapia beblebee ne otumi a kĩ boe Olate kpa boe a sũ. Ekpa boe otumi kĩ bõkõa bõdõõla mi mibo ane, nnẽ kĩ bõkõa bubula mi kade. ^{IX} Ntãwe kĩ fõkena mi nde mado mi libe mo tuvoli kĩ ntsele a. ^X Badi aale kĩ, "Paulo tuvoli kame fõletsa deĩ osĩ, fudeĩ kobẽ malo, leme nte ye moawe a edeĩ ne boe sekẽ kõ ni, elã osĩ ade ye kodzela kale leme lãnyene bati akũ!" ^{XI} Bati a na odu binu foe kayõ, kĩ kavemena kadima lelãa letsa a kĩ bõatsele kado ne boe tuvoli kame nte budeĩ mo lugo, mo letsa a kĩ bõakena nte budeĩ ne mi sekẽ a kame.

^{XII} Ne onokõali kame ni, bõlãawe kĩ bõakõ akũ bõbõa mo ãye bõkõna mo bati a kĩ bamu be akũ beblebee a. Badzimbifo paa banẽ! Bideĩ be moawe tisi kĩ te akũ batsã kakõna akũ kadã, fõesũ badzemõ be akũ ne be moawe tisi a akũ.

XIII Leme boe kō ni, boe kukūpia leláanyina ọbē. Mbom kóana ne awā kī Baguma yi ekpa ne boe adzuma kakena kame, ade boe adzuma ne mi kame leme bu a. **XIV** Ne ayekī mideī ne kako a kī Baguma tsua ekpa boe a kame sū ni, kī bókwa Kale Wī ne Kristo akū a bọama mi a, botányina bónaa tebē a liti. **XV** Foesū bọapia ne adzuma a kī bati bebā kena binyina tebē a kī Baguma yi ekpa boe a akū. Mbom bọadā ane kī mi katekado aabo ane, lókwa bọapuli bókena adzuma baū bónaa loto ne mi kame, ne awā kī Baguma kpa boe ekpula a. **XVI** Ke liti a, bọapuli bunyina mi bónaade letsā ne Kale Wī a akū ne fude bebā kame, ade foláasī kī bọapia ne adzuma a kī bati bebā kena kókwe ne be kako akū a. **XVII** Leme nde ayekī Katsēle Kpalēwa a le kī, “Nte odi awe epia ni, kene kī epia ne letsa a kī boe Ọlate kena a akū.” **XVIII** Kitonekī nné oti a kī yamu ye mọawe akū a nye oti wī, mbom oti a kī boe Ọlate amu nye oti wī.

XI

Paulo Yidza Edza Ne Fovā Foto Banyane Akū.

I Mawe kī mina ọwọle mikpa yī, tito kī miadā kī ndzimbi sukuloo malo. Make mi aduli, mite foe lomo mi kpa yī. **II** Manọ lineke ne mi lolọ nde ayekī Baguma leme ano lineke a. Mila nde oyitsō kī enyina onyole kī ntinya nkpa onyole mọape odi kī enye Kristo mọawe a. **III** Mavila kī bati aabula mi adzuni kade nde ayekī kwe kwa tedake koke Eva, kī miláakwa tọwọle kpalēwa misum Kristo nde ayekī mikakena a. **IV** Kitonekī miate odi nye odi kī yade letsā ne Yesu bebā kī

nné ye akū bude letsā bōkpa mi a mō kawōle mōatse mōatse. Ade ke miatē hūhū mō fōletsa a kī fōvemēna kōlaa nē Hūhū Kpalēwa mō Kalē Wī a kī mite mitomēna boe sēkē a lēmē a.

^V Maābu kī mi foto banyanē a kī miakōna kī benye bati titiliwu badi odu a tē kōya beba yī nē osi odima akū. ^{VI} Ōsa īnyē oti kī yaāpuli kalē kōdzela kalē wī, lēmē mabi mi pipipi kī nné mō kadikanyi kamē. Bōnyē foe bōtsa mi pefee nē lōkō a flee kamē nē osi nyē osi akū.

^{VII} Kī īyale Baguma Kalē Wī a ntsa mi a, ntāte letsama ntomēna mi sēkē. Lēmē ndōla yī akū ayekī baadēla mi nē ode. Tōkpa tanē kī nkēna mbōēē? ^{VIII} Kī nkakēna adzuma nē mi kamē a, tesoli bebā bati lise yī kōtō. Bōabōē foe kī nkayē be kī makōa mbumēna mi.

^{IX} Ade lōkō a kī nna nē mi sēkē a, ntāha mi mō kabumēna nte nsī sika malo. Boe bawāē batē badonē a kī bito Makedonia bēya a lēma yī letsa nyē letsa kī lisī yī. Nde ayekī fōna kōkōē a ade aye fōana nē kunya kamē lēmē a, kī nlāakōa yī akū nkēna fōlōtsa nte nē mi akū da. ^X Kī Kristo ōnōkōali kalē a deī nē yī kamē sū ni, letsama lelāasua yī osi nē kakōma, kī ntipia nē fukī akū nē Akaia tite flee akū. ^{XI} Kalē nlē fukī kitonēkī maāwē mi kalē sū mbōēē? Baguma nyina kī mawē mi kalē!

^{XII} Maakakēna letsa a kī makēna finyaa, kī nlāakōa yī fōlōtsa nte nē mi akū, ayekī fōtō banyanē babebā a lelāana osi bipia akū bele kī bōmō be akēna adzuma nē osi mōape akū.

^{XIII} Bati a na lenyé fōtō banyanē wī, mbom benye fōvā fōtō banyanē kī bakē bati nē be adzuma a kī bakēna a kamē. Bakēna be akū ndē

Kristo foto banyane moawe paa banε. ^{XIV} Fukĩ tákena wāwā, kitonekĩ Abonsam malo apuli kadani ye akũ kadā ndε ode foto ɔnyane aye ne ɔhaĩ kame. ^{XV} Foesũ fonyé letsa baũ lidima nte ye basumune leme dani be akũ bekena ndε Baguma basumune kĩ bakena foto sa ne osi kpĩ akũ. Ne ke kawũna a, baana letsa a kĩ be lekenana feta a perepepe.

Lubo a Kĩ Paulo Mɔ Nde Foto ɔnyane Aye.

^{XVI} Mbuki male kĩ odima etakona kĩ ndzimbi. Leme nte mibu yĩ lomɔ kɔ ni, mite yĩ ndε odzimbifo aye lokɔa yĩ malo mia sukuloo. ^{XVII} Ɔnokɔali kale kĩ male kĩ lenyé letsa a kĩ boe Ɔlate aawe kĩ nle. Ne kukũpia foletsa kĩ kame ni, male kodzela koũ ndε odzimbifo aye. ^{XVIII} Leme ne ayekĩ bati pii apia akũ ne katinya kame foto sa akũ sũ ni, yĩ malo maakɔa foe mpia. ^{XIX} Mi moawe a minye bati kĩ binyina kadi paa, foesũ miana ɔwɔle kate bikĩ bidzimbi a ne kawɔle kame. ^{XX} Nte odi akpã mi ne ɔhe kame, iye yasisi mi, iye yadã mi ne kayɔ kayɔ iye yabale mi ne anε kame malo ni, miate foe mɔ ɔwɔle bɔεε. ^{XXI} Konyɔã foane fokpa yĩ kĩ botána ɔwɔle bokena fukĩna bame odu. Mbɔεε fofeta kĩ bokena lomɔ?

Leme nte odi do ɔwɔle kĩ yapia ne litsedi akũ ni, yĩ malo maado ɔwɔle ndε ye aye, leme finyaa male kodzela ndε odzimbifo aye. ^{XXII} Bale kĩ Hebrifo banε. Oo, yĩ malo Hebrini manε. Bale kĩ Israelfo banε. Yĩ malo Israelni manε. Bale kĩ Abraham babi mɔ bawa banε. Yĩ malo nto Abraham kasinu a kame. ^{XXIII} Bale kĩ Kristo basumune banε. Male kodzela ndε ɔbondamfo

manɛ, lɛmɛ ãnyɛ ɔsumunɛ wĩ mbẽ be! Nkena adzuma mɔ ɔsĩ mba be, bido yĩ nɛ kola mba be, bibo yĩ mɔ kutsei fɔba be, ade nkawo nɛ wuda awɛ kamɛ mɔatɛ mɔatɛ. ^{XXIV} Titi elo mɔa kĩ Yudafo bo yĩ kutsei taalɛ-avedi. ^{XXV} Titi elalɛ kĩ Romafɔ bo yĩ mɔ mpile ade bɛnɔ yĩ boe deedi a. Ndzi nɛ ɔkɔlɔ kamɛ titi elalɛ kĩ ɔwɛ bubuli ye, luwi mɔa mɔ lenyɛ flee nkaho nɛ mui anɛ. ^{XXVI} Nɛ yĩ tisi pii katsã kamɛ ni, tɔwɔ kayili, bayekpanɛ kado yĩ libe ade ayea Yudafo mɔ bikĩ bɛnyɛ Yudafo kawɛ kĩ bakɔ yĩ a. Nna nɛ nkpã mɔ wuda kayite nɛ tɛmatɔ tɛkpale tɛkpale kamɛ, nɛ fupo kamɛ, nɛ mpo anɛ mɔ fɔvã letsã badɛnɛ awɛ kamɛ. ^{XXVII} ãyili akũ nkena adzuma mɔ ɔsĩ, fɔkɔ fudi ndzi kĩ maána tida nwa. Kɔlɛ mɔ ɔmɔado kako yĩ, fɔkɔ fudi ndzi maána funitsã ãnya nwĩ, ade maána kawakɔ ãyɛ tɛtadiɛ kĩ mado a. ^{XXVIII} Nɛ fukĩ flee liti ni, luwi nyɛ luwi tɛsoli a akũ kakɔna kɛna fɔlɔtsa kĩ futeĩ nɛ yĩ ɔwɔlɛ. ^{XXIX} Ntɛ akpɔ veli odi nɛ ye katekado kamɛ ni, akpɔ aveli yĩ kaba. Ntɛ bɛfɔ odi wo nɛ tɔkpa kamɛ ni, mana foe akũ kalɔkpa baũ.

^{XXX} Ntɛ kɛnɛ kĩ mpia akũ ni, maapia nɛ fɔtsa a kĩ fɔatsa kĩ nlá kɔbẽ a akũ. ^{XXXI} Baguma, kĩ ɛnyɛ boe ɔlate Kristo ɔlɛga, kĩ bamu ye dĩ daa a, nyina kĩ nné fɔvã mama. ^{XXXII} Kĩ nna nɛ Damasko a, Lɛgã Areta fɔ bikĩ badã ɔmatɔ a akũ a dza nɛ ɔmatɔ a seebi kɔbã onukpɛ kĩ bipi yĩ. ^{XXXIII} Lɛmɛ bati do yĩ nɛ ɔtsetɛ kamɛ bɛtsãmɛna nɛ seebi nfansili kamɛ bɛkamɛna bɛdzɛla, ade nlo nfɔnɛ ye a.

XII

Paulo Le Ye Anɛ Ketee Fɔda Mɔ Fɔtsa Kanyɛkatsa.

^I Titɔ kɔ nfasɔ adima lɛlɛa kapia kame malo ni, kene kɔ mpia akũ. Leme finyaa maale kɔdzela ne fɔtsa a kɔ mmó ne anɛ ketee fɔda kame, mɔ fɔtsa a kɔ boe ɔlate nye etsa yɔ a akũ. ^{II} Ìnyina onyole odi kɔ enye Kristo ode. Ade futeli ewua-ana kɔ fɔtɛ kɔ bebɔe ye benamena ode flefle a. Ìnyina nte sukena kame ena ìye nné sukena kame ena, mbɔente Baguma odi nyina. ^{III-IV} Mbuki male kɔ ìnyina kɔ bipi onyole kɔ benamena Paradiso kame, leme ìnyina nte ena ne sukena kame, ìye nné sukena kame ena, mbɔente Baguma odi nyina. Ade awã enu fɔtsa a kɔ otidziwa lɛlɛapuli ele, mɔ fɔtsa a kɔ betákpa odima osi kɔ ebinya onukpɛ ne foe akũ. ^V Foesũ maapia ne onyole kɔ akũ, leme nláapia ne yɔ mɔawe akũ, mbɔente ne fɔtsa a kɔ fɔatsa kɔ nlá kɔbɛ a akũ. ^{VI} Nte kawɛ nwe kɔ mapia akũ malo ni, nláakena foe nde odzimbifo aye, kitonekɔ maakale onɔkɔali a. Leme nláapia akũ, kitonekɔ ntáwe kɔ odima ebu yɔ eba ayekɔ enyina kɔ nla a, ne letsa a kɔ emó kɔ nkena mɔ likɔ enu kɔ nle a sũ.

^{VII} Leme ne ayekɔ nláadela yɔ akũ ne ode ne awãwã fɔtsa pii a kɔ Baguma nye etsa yɔ a sũ ni, bido fɔsɔ nde su kɔ sawo paa ne yɔ sukena kame. Fɔsɔ a kɛna nde Abonsam fɔtɔ onyane kɔ fɔkaaha yɔ mɔ osi mɔ osi, ayekɔ nláatene yɔ akũ kadela ne ode. ^{VIII} Mbɔa mpae titi elale nkpa boe ɔlate kɔ enye fɔsɔ kɔ ne yɔ kame. ^{IX} Leme mbuaye kɔ ekpa yɔ nye kɔ, “Yɔ konyakamɔ nye letsa a kɔ

de osĩ, kitonekĩ yĩ kóbě ana osĩ paa nte no olá kóbě.” Foesũ kawole ade yĩ paa kĩ mapia akũ ne yĩ osĩ katana a akũ, ayekĩ maamɔ Kristo kóbě a ne yĩ kame. ^X Foesũ kawole ade yĩ ne osĩ katana, fuvũnatsa, lubo kamɔ, liti katomena, mɔ ohau kamɔ akũ ne Kristo sũ. Kitonekĩ nte nlá kóbě ni, Kristo ado yĩ kóbě.

Paulo Sĩ Akũ Ne Korintofj Bate Badone a Obla Akũ.

^{XI} Male kɔdzela nde odzimbifo aye, leme mi lefɔ nkena foe, kitonekĩ mi nye bati kĩ kene kĩ bimu yĩ kufe. Kitonekĩ tito kĩ ãnyé letsama malo ni, mi foto banyane titiliwu a lebě yĩ ne osi odima akũ. ^{XII} Awāwā mɔ kóbě fotsa, mɔ nsentseleni a kĩ nkɔa owole bɔee nkena ne mi kame a atsa pefee kĩ foto onyane wĩ manɛ. ^{XIII} Nkena tuwĩ tidi nkpa tesoli bebā a mba mi mbɔee? Nné foe nye kĩ ntákɔa yĩ akũ kadā nte ne mi akũ sũ mbɔee? Make mi aduli kĩ mikɔa mite yĩ, ne ayekĩ ntákena mi kakena wĩ sũ!

^{XIV} Finyaa ade lelalede kĩ mmane akũ kĩ mayaasela mi a, leme nláawā mi letsama. Mi mɔawe a mawe, nné mi sika. Malo kɔlaa ni, nné babi kene kĩ bemanɛ fotsa biyi be bamane, mbom bamane kene kĩ bekpɔta fotsa biyi be babi. ^{XV} Maamɔ kawole nte mbula yĩ kóbě flee a kĩ ndeĩ a kade, nkɔa mbumena mi. Nte mawe mi kale paa a ni, nde sũ kene kĩ mi odo a kĩ mideĩ mikpa yĩ a akũ etinya?

^{XVI} Foesũ mite foe kĩ ntánya folotsa nte ne mi akũ. Leme badi aale kĩ ndeĩ tedake, ade nke mi ne nyansā kame nte fotsa a. ^{XVII} Ntsā batɔ a kĩ ndo ne mi sekě a kame odi akũ nsisi mi mbɔee?

XVIII Nke Tito aduli kī eya ne mi sekē, ade ndo ɔte odone bebā leme kī etomo ye a. Míale kī Tito sisi mi mbɔɛɛ? Mbɔɛɛ nné kakona mɔape a bomo ye bɔneɛ, bɔtsē osi mɔape a leme akū bɔakena adzuma?

XIX Ɔsa miakona kī ne foe kame a, bɔbɔa mbɔdi kī bɔapili boe lolɔ ne mi ane. Oowo, fólá lomɔ! Bɔale kɔdzela nde ayekī Kristo awe kī bɔle kɔdzela ne Baguma ane. Nwaē ame, letsa nye letsa kī bɔakena ni, bɔakena foe kī fubumena mi mibo ane ne mi katekado kame. XX Mavila kī nte iyawo awā ni, maamo mi kī miláana nde ayekī maawe kī mina, ade ayea mi malo miláamo yī nde ayekī miawe kī nna a. Mavila kī maayamo ɔdze kakena, mo lineke kanɔ, mo kalokpa kana mɔatse mɔatse, mo akū odi fude kawe, mo fuvūnatsa, mo bati buī kanye, mo lukūta mo onukpē mɔa katakena ne mi kame.

XXI Mavila leme kī nte mbuki iya ni, yī Baguma aadɔla yī ne mi ane, ade maabe nko ne bati pii a kī bekena tokpa betē a akū. Kitonekī betádani towɔle kame ne efiī fotsa mo sukena fowetsa kpa kakena kame, mo litsolewe mo linyolewe akū a.

XIII

Paulo Kpa Korintofɔ Kɔde Nkaɛ.

I Ade fukī nye lelalede kī maayasela mi a. Katsɛle Kpalɛwa a le kī, “Nte bebɔe fɔletsa ne odi akū ni, kene kī adansifo nviā iye be elale bele kī fɔletsa a deī ne foe kame fomɔ baako ye kɔto.”

II Kī iya ne mi sekē leyade a, nde bati a kī bekena titikpa ne lokɔ kī letē kame, mo bati bebā leme. Leme maabuki nle foe finyaa, kī nláa mi sekē

malo. Nte mbuki ñya ni, odima leláane ne soto kavere kame. **III** Míamọ yí kádzakõ a kĩ miawe a, kĩ fọatsa kĩ Kristo ale kọdzela katsāmena yí akū a. Nte yakena adzuma ne mi kame ni, ye kõ etádo, mbom yanye ye kọbẽ katsa ne mi kame. **IV** Kĩ bebọa ye ne asendua akū a, edo leme Baguma kọbẽ fõ edzi nkpā. Ade ayea boe a kĩ bọkena omọa mọ Kristo a bolá osĩ a, leme Baguma aado boe kọbẽ ayekĩ bọapuli bọkena adzuma a kĩ kene kĩ bọkena ne mi kame a.

V Minaa mi kame, misọ mi akū midā nte midzi ne mi katekado onukpě. Mitámọ miyi osū kĩ Yesu Kristo deĩ ne mi kame mbọee? Minyina kĩ edeĩ ne mi kame, mbọente mitákpọla ne mi akū kasokadā a kame. **VI** Mate kado kĩ míayanyi kĩ boe kõ bọnya akū ne kasokadā a kame. **VII** Bọake Baguma aduli kĩ mitakena nfumusu adima, nné kĩ bati aamọ kĩ bọnya akū ne boe akū kasokadā a kame, mbom kĩ miakena fọtsa wĩ tito kĩ fọadā nde boe adzuma kakena tákpọla malo. **VIII** Kitonekĩ boláapuli bọkena letsama butia onokọali a, mbom kene kĩ bọadza pintii bọkpa onokọali a. **IX** Kawọle ade boe nte bọdo, mọ mi kõ midzẽ pintii ne mi katekado kame. Ne foesū bọabọa mpae kĩ mibo ane mikpọla flefle. **X** Ade foesū matsẹle mi ovoli kĩ ne loko a kĩ ndzakū ne mi sekẽ a. Nkena foe lomọ ayekĩ nte ñyawo awā ni, nláakọa kọbẽ a kĩ boe Ọlate kpa yĩ a nvele mi mọ osĩ mọ osĩ. Ekpa yĩ kọbẽ a kĩ nkọa ndọla mi mibo ane ne mi katekado kame, nné kĩ makọa mbula mi kade.

XI Nwaẽ ame, ne kawūna ni, midzi kadzi wĩ. Mibo ane mikpọla flefle ne mi katekado

kamε. Mibɔa mbɔdi mikεna nε yĩ kɔdε a akũ, mikεna onukpẽ mɔa, midzi nε lukudɔ kamε lemε. Baguma kĩ yawε bati kalε, mɔ ye lukudɔ lemε litomɔ mi flee.

^{XII} Miwɔna akũ flee nε Baguma lukudɔ kamε.

^{XIII} Baguma bade a flee awɔna mi!

^{XIV} Boe ɔlate Yesu Kristo kɔnyakamɔ, Baguma ɔdɔ, mɔ Hũhũ Kpalεwa a ɔmɔa kakεna a, fɔna nε mi flee kamε.

xxx

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

68df0193-2981-5275-8994-8f743fe01e5e